



## Headlines

1. आम चुनावें दे अगले गेड़ लेई चुनावें प्रचार जोरें-शोरें नै चला'रदा ऐ। सियासी लीडर लोकें दा समर्थन हासल करने लेई रैलियां करा'रदे न।
2. नामांकन पत्रें दी जांच मगरा अनंतनाग-राजौरी पार्लिमानी हल्के च 21 मेदवार चुनावें मैदान च रेह। नामांकन परताने दी कल खीरी तरीक।
3. प्रधानमंत्री नरेन्द्र मोदी होरें आक्खेआ जे प्रवर्तन निदेशालय ते सीबीआई सरकार जां सियासी लीडरें दी दखलअंदाजी दे बगैर आजादाना तरीके नै अपना कम्म करदियां न।
4. उपराज्यपाल मनोज सिन्हा होरें जम्मू कश्मीर च महत्वै आलिण बिजली परियोजनाएं दा जायजा लैता। उनें श्री अमरनाथ जी दी यात्रा दी ग्रिड कनेक्टीविटी आले धरतै दी हेठली केबलिंग परियोजना दा जायजा लेआ।



## Campaigning

जंदे शुक्रवारें पैहले गेड़ दे चुनावें मुकम्मल होने मगरा आम चुनावें दे बकाया पेदे चुनावें लेई चुनावें प्रचार होर तेज होई गोआ ऐ। जम्मू कश्मीर दी जम्मू सीट ते अनंतनाग-राजौरी आले पार्लिमानी हल्के च बिल तरतीब 26 अप्रैल ते 7 मई गी दुए ते त्रिये गेड़ तैहत वोट पोआए जांगन। दुए गेड़ दे चुनावें प्रचार लेई हुन शड़े 4 दिन गै बकाया रेही गे न ते सियासी लीडर जोरें-शोरें नै अपने मेदवार दे हक्कै च लोकें दा समर्थन कठेरने च कोई कसर बाकी नेई छोड़ा'रदे न। जम्मू च 22एं मेदवारें चा बीजेपी दे मेदवार ते संसद सदस्य जुगल किशोर शर्मा जेहड़े त्री अवधि लेई चुनावें मैदान च न ते साबका मंत्री ते कांग्रेस पार्टी दे कार्यकारी अध्यक्ष रमण भल्ला हुंदे बशकार कड़ी टक्कर ऐ। अनंतनाग च 21एं मेदवारें चा साबका मुखमंत्री ते पीडीपी अध्यक्ष महबूबा मुफ्ती ते नैशनल कांग्रेस दे मेदवार मियां अल्ताफ हुंदे मझाटै सिद्दा टाकरा ऐ। इआं बीजेपी नै राजौरी-अनंतनाग पार्लिमानी हल्के पर अपना कोई मेदवार नेई खडेरेआ ऐ। सब्बने सियासी पार्टिण दे स्टार प्रचारक INDI गठबंधन ते एनडीए मुख्य भरै च मतदाताएं गी अपने पाससै करने लेई रैलियां करा'रदे न।

<><><><><><>

## Door to Door(byte)

सांबा जिले च जेहड़ा जम्मू-रियासी लोकसभ सीटै तैहत औंदा ऐ बर्जुग ते दिव्यांग मतदाताएं लेई उंदे घर जाइयै उंदा वोट पोआने लेई सब्बै तैआरियां चला'रदियां न। एहदे लेई 21 ते 22 अप्रैल दो दिन तैह कीते गेदे न। लोक भारती चुनां आयोग दी इस पैहलकदमी कन्नै बड़े खुश न।

<><><><><><>

## Nomination

अनंतनाग-राजौरी पार्लिमानी हल्के आस्तै मेदवारें दे नामांकन पत्रें दी जांच दी प्रक्रिया रिटर्निंग अफसर सईद फखुद्दीन हमीद हुंदी तरफा पूरी होई चुकी ऐ। जांच दरान 4 मेदवारें दे नामांकन पत्र चुनां आयोग दे दिशा-निर्देशें मताबक अधूरे पाए गे। इस करी उंदा नामांकन नामंजूर करी दित्ता गेआ। एहदे मगरा चुनां मैदान च कुल 21 मेदवार रेही गे न। मेदवार अपना नामांकन 22 अप्रैल दपैहरी 3 बजे तोड़ी परताई सकदे न। 21एं मेदवारें च साबका मुखमंत्री ते पीडीपी प्रधान महबूबा मुफ्ती, साबका मंत्री ते नैशन कांफ्रेंस मेदवार मियां अल्ताफ, साबका पार्षद जफर इकबाल मन्हास जेहड़े के अपनी पार्टी दी तरफा मैदान च न।

<><><><><><>

## Modi Interview

प्रधानमंत्री नरेन्द्र मोदी होरें आक्खेआ ऐ जे प्रवर्तन निदेशालय ते सीबीआई जनेई केन्द्री अजेंसिएं गी आजादाना तौर पर कम्म करन देना लोड़चदा ऐ ते सरकार कन्नै लीडरें गी बी इंदे कम्मकाज च दखल नेई देना चाहिदा। इक निजी चैनल कन्नै गल्लबात च उनें गलाया जे केन्द्री अजेंसियां अपना कम्म करा करदियां न ते प्रधानमंत्री गी बी ईडी दे कम्मकाज च दखल अंदाजी करने दा कोई हक्क नेई ऐ। उनें गलाया जे 2014 शा पैहले प्रवर्तन निदेशालय नै शड़े 84 ठकाने दी तपाशी लैती ही, जेल्ले के 2014 बाद 7 ज्हार थाहरें दी तपाशी लैती जाई चुकी दी ऐ जेहदे कन्नै पता चलदा ऐ जे अजेंसी किन्नी बेहतरी कन्नै कम्म करा करदी ऐ। प्रधानमंत्री होरें गलाया जे उंदी सरकार देसै दे हर बसनीक ते टकोहदा करियै माली तौरा पर कमजोर लोकें गी बाइख्तेयार बनाने दे मॉडल पर कम्म करा करदी ऐ। उनें गलाया जे नागरिकें दा भार घट्ट करना सरकारै दी जिम्मेदारी ऐ। इक होर सुआले दे परते च श्री मोदी होरें आक्खेआ जे मजूदा लोकसभा चुनां बीजेपी जां प्रधानमंत्री आस्सेआ नेई लड़ेआ जा करदा सगुआं एह जनता दी पैहल ऐ।

<><><><><><>

## Arms Reasi

इक बड्डी कामयाबी हासल करदे होई पुलस नै रियासी जिले च आतंकवादिएं दे ठकाने थमां थेआर ते गोला बरूद बरामद कीता ऐ। इक वरिष्ठ पुलस अधिकारी नै जानकारी दित्ती ऐ जे हासल सूह पर कारवाई करदे होई अरनास दे दलास बरनेली च इक तपाशी अभियान चलाया गेआ। इस दरान पुलस दलें गी 2 डैटोनेटर, असाल्ट रैफल दे 12 कारतूस, आईईडी युक्त 1 टेप रिकार्डर ते 1 कैलकुलेटर, इक बैटरी ते किश तारां लब्धिया न।

<><><><><><>

## Mahavir Jayanti

महावीर जयंति अज्ज रिवायती अंदाज ते धार्मिक श्रद्धा कन्नै जोरें-शोरें नै मनाई जा'रदी ऐ। इस शुभ मौके जैन धर्म गी मनने आले जैन मंदरें च जाइयै पूजा अर्चना करा करदे न। नेकें थाहरें पर भगवान महावीर हुंदी मूर्ति कन्नै शोभा यात्रा बी कडिडयां जांगन। महावीर जयंति दे पवित्र मौके पर प्रधानमंत्री नरेन्द्र मोदी होर अज्ज दिल्ली दे भारत मंडपम च हुनै कोला किश चिरै परैंत 10 बजे 2550में भगवान महावीर निर्वाण महोत्सव दा उद्घाटन करगंन। श्री मोदी होर इस मौके स्मारक डाक टिकट ते सिक्का जारी करगंन ते लोकें गी संबोधत बी करगंन। राष्ट्रपति द्रौपदी मुर्मू होरें बी सारे देशवासिएं गी खास करियै जैन समुदाय गी महावीर जयंति दी शुभकामना दित्तियां न। उपराज्यपाल मनोज सिंह होरें बी जैन समुदाय गी महावीर जयंति दी शुभकामनां दित्तियां न। अपने इक सनेह च उपराज्यपाल होरें आक्खेआ जे भगवान महावीर होरें असंगी सच्चाई, करुणा ते सेही कम्म करने दा रस्ता दस्सेआ हा। असें सारें गी उंदे दस्सदे दे रस्ते पर चलना चाहिदा ते समाज च भाईचारे च एकता गी मजबूत करने आस्तै अपना योगदान देना चाहिदा।

<><><><><><>

## LG PDD

उपराज्यपाल मनोज सिन्हा होरें कल बिजली विभाग दे कम्मकाज दे सरबंध च इक समीक्षा बैठक दी अध्यक्षता कीती। औंदी गर्मिएं च बिजली दी आपूर्ति ते दुए प्रमुख परियोजनाएं ते स्कीमें हेठ होआ दे कम्मं बारे तफसीली चर्चा कीती गई। उपराज्यपाल होरें बिजली दे नुक्सान, स्मार्ट मीटरें दे लगने च दर्ज प्रगति बारे पुट्टी जा'रदिएं गेंही बारे जानकारी लैती। बिजली चोरी दे मुद्दें पर बोलदे होई उपराज्यपाल होरें जमीनी सतह पर परिवर्तन कोशशें गी बधाने आस्तै गलाया। उनें उपभोक्ताएं दी सहूलियत आसतै नमें बिजली दे कनेक्शन लैने दी प्रक्रिया गी असान करने आस्तै आक्खेआ। इस बैठक च श्री अमरनाथ जी दी यात्रा दी ग्रिड कनेक्टीविटी आस्तै जमीन हेठ केबल परियोजना दी प्रगति बारे बी चर्चा कीती गई। उपराज्यपाल होरें अधिकारिएं गी पवित्र श्री अमरनाथ यात्रा शुरू होने कोला पैहले गै कम्म पूरा करने दे निर्देश दित्ते न। उनें विभाग गी गर्मिएं च बिजली दी आपूर्ति गी सुनिश्चित करने आस्तै बी आक्खेआ। उनें "पीएम सूर्य घर मुफ्त

बिजली योजना" बारे लोकें गी जागरूक करने पर बी जोर पाया। इस स्कीम दे जरिये लोक बिजली गी बचाई सकदे न ते कन्नो कन्नी अतिरिक्त बचाई गेदी बिजली DISCOMS गी देइयै पैहा बी कमाई सकदे न।

<><><><><><>

### SVEEP Suchetgarh

लोकतांत्रिक जजबें दे इक प्रीवावशाली प्रदर्शन च जिला प्रशासन जम्मू नै सैलसफा निदेशालय कन्नै रलियै कल सुचेतगढ़ .....पोस्ट पर इक शानदार सांस्कृतिक प्रोग्राम दा आयोजन कीता। मुख् चुनां अधिकारी पी.के. पोले, जिला चुनां अधिकारी सचिन कुमार वैश्य, आम निगरान राहुल रंजन ते एसएसपी जम्मू विनोद कुमार बी इस मौके उत्थें मजूद हे। मन्ने दे गायक संग्राम हाजड़ा हुंदी उत्कृष्ट गायकी नै समां बन्नी ओड़ेआ। उनें चुनां प्रक्रिया च बधी—चढ़ियै हिस्सा लैने लेई मजूद लोकें गी जागरूक ते प्रेरित कीता।

<><><><><><>

### CS-Camp

मुख् सचिव अटल डुल्लू होरें अज्ज जगती ग्रां दे उप—जिला अस्पताल च दऊं रोजा मल्टी स्पैशियल्टी मैडिकल कैंप दा आयोजन करोआया। इस कैंप दरान दमागी बमारिएं दे माहिर डॉ. सुशील राजदान ते होरने माहिरें डाक्टरें आस्सेआ रलियै लोकें दी मुफ्त जांच कीती जाग। मुख् सचिव होरें विश्व कश्मीरी समाज दी इस पैहलकदमी आस्तै सराहना कीती ते आक्खेआ जे इयै नेह् मैडिकल कैंप आम लोकें गी बेहतरिन मैडिकल पेशेवरें थमां सलाह लैने दा मौका उपलब्ध करोआंदे न।

<><><><><><>

### Lok Adalat

संघ शासत जम्मू कश्मीर दिएं बक्ख—बक्ख अदालतें च बकाया पेदे एमएसीटी ते बैंक रिकवरी आले मामलें गी कल इक विशेष लोक अदालत च नबेड़ी दित्ता गेआ। जम्मू कश्मीर दे बक्ख—बक्ख जिला कनूनी सेवा प्राधिकरणें आस्सेआ हासल आंकड़े मूजब विशेष लोक अदालत च 667एं मामलें दी सुनवाई होई जिंदे चा 217 मामलें गी दौनें पक्खें गी मनोदे फैसले कन्नै नबेड़ी दित्ता गेआ। इस दरान 6 करोड़ 83 लक्ख 11 ज्हार 343 रपें दी रकम, मुकदमा करने आलें दे हक्कै च देइयै उनें गी राहत दित्ती गई। जिला गांदरबल च 53एं मामलें चा सब्बने शा मते 50 मामले नबेड़े गे।

<><><><><><>